

四庫全書

集部

欽定四庫全書

集部

御定歷代賦彙外集卷十三

詳校官檢討_臣劉 炘

主事銜_臣徐以坤覆勘

總校官編修_臣王燕緒

校對官中書_臣陸 湘

謄錄監生_臣張永浙

欽定四庫全書

御定歷代賦彙外集卷十三

曠達

玄暢賦

有方

魏

曹

植

夫富者非財也貴者非寶也或有輕爵祿而重榮聲者
或有反性命而徇功名者是以孔老異情楊墨殊義聊
作斯賦名曰玄暢

夫何希世之大人罄天壤而作皇該仁聖之上義據神

位以統方補五帝之漏目綴三代之維網僥余生之倖
祿邁九二之嘉祥上同契於稷禹降合穎於伊望思薦
寶以繼佩怨和璞之始鑄思黃鍾以協律怨伶夔之不
存嗟所圖之莫合悵蘊結而延佇希鵬舉以搏天蹶青
雲而奮羽舍余駟而改駕任中才之展御望前軌而致
策顧後乘而安驅匪逞邁之短修取全真而保素弘道
德以為宇箴無怨以作藩播慈惠以為圃畊柔順以為
田不愧景而慙魄信樂天之何欲逸千載而流聲超遺

黎而度俗

登真賦

唐
吳筠

悟世促而道永知名踈而體親遂忘機而滅跡方鍊骨
而清神道不予欺兮感通象罔天必我鑒兮保合元真
陰滓落而形超陽靈全而羽化惟九仙之奕奕降八景
而來迓何霓旌之悠揚吾其整此霄駕持造化之系出
存亡之表遊四野之冥冥近三辰之皎皎涉虛寥之浩
曠覺宇宙之卑湫龍鸞踈兮升我於玄都流玉音於至

寂散金光於大無星官後從雲將前驅使八威於六領
盪遺祇於天衢麾百魔以震伏總萬靈以遊娛翠旄紛
紛兮拂重霄而凌厲入閭闔之九闢過太微而一憩倚
華蓋而招真登紫庭而謁帝飲予以沆瀣樂予以玄鈞
左盼夫鬱儀右瞻乎結璘信巍巍以蕩蕩肅肅而振振
享讌斯徹遨嬉未已泛鮑河之廣流蹇析木之芳蕊靈
杳靄而八衝寶雲沓而四起諒茲境之足悅乃此情之
匪留揚玉輪以逕進更冉冉而上浮控三氣而高舉何

萬夫之足越覲元始於玉晨謁虛皇於金闕真朋森而
無算咸顧予以致悅於是凝而為有散而為宗見不以
察聞不以聽視極於無際聽周於無窮動不因心飛不
假翼與浩劫而靈長視萬椿為一息或躋綺合之榭或
宴圓華之房躡太漠之清迴弄明霞之焜煌仰瑤嶺之
嵯峨俯碧津之湯湯羅絳樹之背藹激神風之琳琅何
至樂之歷極永逍遙以為常

紀道德賦

五代

杜光庭

道德清虛玄默生帝先為聖則聽之不聞搏之不得至
德本無為人中多自惑在洗心而息慮亦知白而守黑
百姓日用而不知上士勤行而必克既鼓鑄於乾坤品
物信克初乎東西南北三星高拱兮任以自然五常垂
衣兮修之不惑以心體之者為四海之主以身輓之者
為萬夫之特有皓齒青娥者為伐命之斧蘊奇謀廣智
者為盜國之賊曾未若軒后順風兮清靜自化曾未若
皋陶邁種兮溫恭允塞故可以越圓清方濁兮不始不

終何止乎居九流五常兮理家理國豈不聞乎天地非
道德也無以清寧豈不聞乎道德於天地也有踰繩墨
語不云乎仲尼有言朝聞道夕死可矣所以垂萬古歷
百王不敢離之於頃刻懷古今云古今感事傷心驚得
喪歎浮沈風驅寒暑川注光陰始銜朱顏麗俄悲白髮
侵嗟四豪之不返痛七貴以難尋夸父興懷於落照田
文起怨於鳴琴鴈足淒涼兮傳恨緒鳳臺寂寞兮有遺
音朔漠幽囚兮天長地久瀟湘隔別兮水闊煙深誰能

絕聖韜賢餐芝餌術誰能含光遜世鍊石燒金君不見
屈大夫紉蘭而發諫君不見賈太傅忌鵬而愁吟君不
見四皓避秦峩峩戀商嶺君不見二疎辭漢飄飄歸故
林胡為乎冒進貪名踐危途與傾轍胡為乎怙權恃寵
顧華飾與雕簪吾所以思抗跡忘機用虛無為師範吾
所以思去奢滅慾保道德為規箴不能勞神效蘇子張
生兮於時而縱辯不能勞神效楊朱墨翟兮揮涕以沾
襟

空同賦

宋朱子

何孟秋之玄夜兮心慘戾而弗怡偃予軀之既寧兮神
杳杳兮寒閨雲幄掩而弗扃兮壁帶耿而夜光宕予魄
而不得視兮悵竚立其怔營靈修顧予而一笑兮歡並
坐之從容寐將分而不忍兮旦欲往而焉從眷予衷之
廓落兮奄愁結而增忡超吾升彼崑崙兮路脩遠而焉
窮忽憑危以臨睨兮歲廣寒與閨風信真際之明融兮
又何必懷此夢也矢予詞以自寫兮盍將反予旆乎空

同

棲深賦

元劉詵

六合之內八荒之壖匪皋匪涖不甸不厘有岡伏興望之芊緜盖得名於吾黨而託之乎槐黃之一言於是過者喟然而語曰此非姓溪以冉而名谷以隱者之盤旋邪非科目之已遠而寄想象於千年者邪爰有有道築居其巔問其所從來則盖元祐之初年矣青山繚屋古木橫天籬援翳塗藤茨入椽內環洗墨之池外遶種秫

之田竹分徑造之所蔬滿日涉之園春林雨過花澗流
泉孤鶯自啼時鳥雜喧清風墜籜永日聞蟬焚香起坐
茶味入禪微涼蕭瑟林木自絃秋清賦詩脫葉如箋天
寒酒熟梅花入簷峰雪成畫牆暎獻暄閱大化之迭序
甘窮居以為緣族四世而無狹乃構寬於厥先折干雲
以為棟逝棲鳥而為樛鳴機隱於內雷藏籍蠹於西偏
文公題記韻士贊篇風月不待獻而彌勝江山不假飾
而增妍念百年之種樹終自庇於本根又歌聚之從起

待千載之雲間豈瓢風之畫語異茅雨之夜眠比隱橘
而非幻擬種桃而非仙於是先生欣然而笑曰深矣吾
之棲也可以驕元亮而傲玉川矣客有難之曰吾聞淺
深表裏所分山之深也在谷水之深也為淵今先生之
居介毫末於一馬寄圭粟於大千南匪其中北匪其邊
而先生何所指以為深焉左眺高闔右接廣阡暘車望
其林翳饑袂想其吹煙而先生何所恃以為深焉窮搜
逐討談空說玄問字填巷受經款門使昧者欲赴於其

燧辯者欲磨於其堅而先生何所匿以為深焉先生曰
夫泥於迹者常有所窮游於化者或有所全吾聞至人
入水不濡入火不熱會光塵於一隙混涇渭於同源故
卜於肆者庸知其非隱行於市者安知其非仙嵇康好
琴靈運遊山伯倫酒狂張旭草顛豈所託之或淺常不
離乎人間顧吾深之安在誠可指於目前彼山林之委
塊亦身外之附懸於是客莫能詰走若季咸望其樓而
不見渺山水之蒼然

適忘賦

元馬祖常

適機子遇忘機子於大都適機子曰若知吾適機乎凡
羣動萬彙叢生皆來肯綮轆轤泉滲穴開揣摩捭闔迎
合附會孕姦媒孽逆承人意子不吾信請衍斯義惟是
都也子欲浮聞越吳蜀則登舟子欲走并冀朔漠則升
車若東若西或南或北扶耄挈稚囊金橐穀發軔則達
不俟龜卜顧茲弗覺而踽踽齷齷木偶弗若譬驥之童
鬣牛之食角子何不智甚邪忘機子曰子庸知我之底

蘊邪今子說我以私智啗我以功利陰墜厥醜陽塗其
麗固妻妾之所羞而輿臺之是貴我游神八紘而身寓
一室心翫千古而視不離席幽晦莫耀韜閟莫測明是
非於後世公得失於方策邈邈繇繇似消似息鑑空淵
渟罔有形迹子令我登航浮流則航有覆令我升車涉
途則車有軼何發軔之遽達而謬以不知目我哉適機
子啞而愕噓而笑曰八紘寥廓子將奚托千古冥冥子
庸用學曄煌煌之輿馬烜赫赫之官爵彼幽晦與韜閟

實狴犴與鈴鐺後世孰親於妻奴方冊孰快於女樂同
生同死皋夔羿浞世方溟渤兮翹灋灋喔咿栗斯無害
於儀鷗夷脂韋無損於皮若夫航之覆車之軼寧盡廢
車航也哉不智之機子復何辭忘機子拊髀鼓膺咤且
呼曰初聞若之辯可駭可慕旋而籌之惟螽惟蠹慨戰
國之口頰俾宗廟其墟墓墨焉朱焉悲絲泣路繫二賢
雖詭迹於孔孟庶憚天於朝暮順於飢飽改我軌步或
噓或煦或濡或响雜肖翹於一喘羣黃卉於一澍擿埴

索塗螟屑羸負吾恐禍天下之英才子且吞言而勿吐
適機子曰有是哉姑置之子自礪爾璞我固淬我稍孰
利孰鈍厥效卓卓忘機子曰大璞不礪大金不淬蔑爾
利鈍奚傷至器二子方藻吻簧舌矛盾辯詰有馬子者
魯仲連之流也以書連矢射其所曰夫天地精明人實
肖形倥侗顓蒙教學陶鈞蓋金玉之合應匪忘適之異
情子盍聽鈞天於廣野覲萬舞於天庭然後範聖度揆
時中蹈龍蛇占鳳麟茲豈非莊周氏所謂天民者乎二

子解圍合盟而去

雲卧八極賦

有序

元

吳師道

集賢都事李君漑之風神高邁夙有山林之趣題其室曰雲卧八極取太白詩語也且命東陽吳某賦之愚觀君方以才業用而其言將飄然獨往者故為之具道其樂而復因末簡以致意焉其辭曰

承玄元之遐胄兮復孕靈於長庚
竇高姿之絕塵兮中湛然而潔清
餐玉芝以為糧兮吸沆瀣於金莖
襲蓀蘭

之芳菲兮憂明璫之晶熒渺獨立乎物表兮隘濁壤之
營營羨山林之幽遐兮有白雲之英英攀謝公之遺躅
兮契希夷之高情澹怡悅而自足兮誰與共茲一壑撫
磐石以為牀兮翳長林以為幄被純素之幽光兮睨浮
游之冥漠羅孤彈之清琴兮送雙翔之黃鶴燕飛泉而
漱松風兮渺天宇之寥廓歛飛神而輕舉兮凌倒景而
上浮建采虹以為旗兮挾迅電以為輶前飛廉而後豐
隆兮並羲和而奔流始發軔於暘谷兮拂予袂兮扶桑

卷十三
遵吳隅而行邁兮遂窮歷乎炎荒軼朱天之曠莽兮直
參井之所當跨崑崙而越流沙兮求曜靈之所藏不周
呀其欲合兮余超凌以徑度馳閭野之重陰兮命燭龍
使先路循尾閭而抵艮維兮復蕩蕩其無終予游曷其
有尼兮聊弭節而從容曠一息而萬里兮睇窮髮於咫尺
俯齊州之九點兮曾不啻夫蟻垤嘒下土之擾擾兮
紛萬蚋之起滅志彷徨而廣大兮形逍遙而自得羌茲
樂之可懷兮吾寧放而忘返聖乘則而植中兮揆厥初

而不遠散充溢於無垠兮斂不滿夫錙銖妙元化之於
穆兮信機要之有樞擴方字之內外兮顧何適而非途
時動靜而不愆兮與造物而為徒委余心而一致兮又
何必遯世而離居亂曰雲蟠林栖荒以寂兮埃壘溷濁
不可息兮至人之心不滯於迹兮惟時惟中自太一兮

海闊天空賦

明
黃儒炳

有寥廓先生兀然塊處冲然自如鏡靈心於兩界佇玄
覽於中區浮游象外逍遙太虛妙橐籥而非有入象罔

而非無撓機子過而詰之曰人之生也抱識含靈境緣
互逐萌一緒而千變兆片機而萬觸無頃刻而怙想譬
波委而雲屬今吾子徒浪迹以放神毋迺闊於步而踈
於局與寥廓先生憮然曰噫嘻大道渾渾一量參差悲
子狹識甕底醢鷄邈哉玄聖海天襟期橫施直際孰踰
範圍請言其大以釋子迷若夫百谷稱王尾閭汎濫勢
力橫撼渺瀰淩漫浮天沃日吞吐無岸鱗族介羣赴浪
逐澹或潛或躍呀呷簇羅沫鯽鮒而不亂流化鯢鯨而

不益波水府幽壑茹納引多彼靈物與寶藏差難知其
幾何至若輕清上浮迴環蓋倚霽景方澄長空萬里天
邊引颺靜埽氛靄仰碧落之無垠見孤嶂之屹峙則有
逸遊飛鳥順勢飄飄上下頡頏習習啁啾大鵬無待側
翼鸞鳩不妨羣翔彼蠓蟻其一氣曾何礙於覆幬物與
物而交動幹流轉而莫息雖分布於飛潛何天淵之盈
塞煦灑潏以相忘欣吹萬於咸拂繫吾生之胸次元同
焉而皆得沛浩浩之洪流炯蒼蒼之昭質與太初而為

鄰紛煩襟之自汨爾其希世達士遊心玄冥一塵不累
萬慮何營罔飄忽於慾海詎點綴於太清九臯或喻其
岑寂千頃莫狀其汪泓軋海屋以崇居摩天倪以抗旌
闕銀山而泛日盼玉宇而開局遊戲九垓躡雲曳屐一
簸一揚連山瀆澤任煙濤之卷舒挹風日而光霽悶因
應於物情解有同於縣寓彼河伯與雲將且望空闊而
悚愧又况吾子之貿貿何異挾蠡而測重溟握管而窺
天際於時櫻機子聞言愾罔若狂胸次恢張遂起而為

歌曰有美一人倚道遙下靈派兮上雲霄金玄牝兮根
祇祛害馬兮煩囂連天渺渺金樞見漫道排闥帝闕高

酒隱賦

有序

宋蘇軾

鳳山之陽有逸人焉以酒自晦久之士大夫知其名謂
之酒隱君目其居曰酒隱堂從而歌詠者不可勝紀隱
者患其名之著也於是投迹仕途即以混世官於合肥
郡之舒城嘗與遊因與作賦歸書其堂云

世事悠悠浮雲聚漚昔是濬壑今為崇丘眇萬事於一

瞬孰能兼忘而獨遊爰有達人泛觀天地不擇山林而
能避世引壺觴以自娛期隱身於一醉且曰封侯萬里
賜璧一雙從使秦帝橫令楚王飛鳥已盡彎弓不藏至
於血刃膏鼎家夷族亡與夫洗耳潁尾食薇首陽抱信
秋溺徇名立僵臧穀之異尚同歸於亡羊於是笑躡糟
丘挹精去粕酣羲皇之真味反太初之至樂烹混沌以
調羹竭滄溟而反爵邀同歸而無徒每躊躇而自酌若
乃池邊倒載甕下高眠背後持鉗杖頭掛錢遇故人而

腐脅逢麴車而流涎暫託物以排意豈胸中而洞然使其推墟破夢則擾擾萬緒起矣烏足以名世而稱賢者邪

松江蟹舍賦

宋高似孫

鷗夷子皮既相句踐讐闔閭殄夫差弔子胥無纖恨於越人乃騁懷於西吳乃昂然作喟然吁曰兔死犬烹鴻罹於罟古人所危吾其亟圖方將朝三江夕五湖一去不回樂哉此桴展其遺於人間情嫋嫋於姑蘇水統乎

笠澤天包乎具區松陸互潮太湖交瀦川納壑府波畫
邨墟石罅碕岸崖釐別嶇波程杳渺水路盤迂洄渚基
布聚落星敷采之於山則綠膩女桑黃苞橘奴收菽貢
梨剥棗擷茶取之於水則絲被紫萼筍含青菰采菱春
芡食蓮燒蘆是皆舟子所鄉魚郎所廬葭茨兮為域莞
葦兮為郭鴻鷺兮為鄰鵲鷄兮為徒時則天澄月淨風
恬靄舒或霧氣之濛沫或煙雨之扶疎棹歌亂發漁榜
疾徐命儔嘯侶靡一不魚蔭柳邊之巢樛注隅花之冒

無兒奏輕笥婦呼飛鼠水事滅滅一發靡虛乃有鱸殘
之鯽四鰓之鱸環異叢毓鱗甲紛拏腥皆會於漁市羨
足給於魚租至於露老霜來日月其徂萬螯生涼含黃
脂膚其武郭索其雄雉吁其心易躁其腸實枯勇鼓而
喧集齊奔而並驅鴟夷公顧而笑曰昔者吳之將微民
甚難虞厥有躁亂害於菑畲是固汝輩之所騁者歟吳
人趨而告曰當是時也善有鮮鑒貞有罕孚樂鳩乎毒
習甘乎諛一豔方妍漂香沈珠樂極危生淪胥以鋪是

故非蟹罪也維我吳人以漁為娛每施勤於簷斷皆得
志於江塗方洞庭兮始霜熟萬稼兮豐腴執一穗兮朝
魁目洪溟兮爭趨工緯蕭兮承流截威沸兮防逋燎以
乾葦檻以青筠喧動涼莖驚飛宿鳧其多也如涿野之
兵其聚也如太原之俘蟹事卓犖八荒所無今敢藉以
涼荻東之風蒲願奉一醉獻諸大夫大夫嗒然笑曰嗟
汝吳兮巨麗樂太伯兮開初括於越兮自裕跨蠻荆兮
遠模千星紀兮經略控軫野兮車書至若藪澤幽靈川

瀆漈滂灌注兮天下之半鬱拂兮瀛洲之居忘越矢之
倏西歎麋臺之交燕余方超萬物兮如蛻豈一蟹兮樂
且吳人再拜進曰大夫高矣儂聞宅金湯之固者莫崇
乎德者也建竹帛之功者莫勇乎謀者也目吳越之成
敗愾君臣之嗟戲然儂者生長水國子孫澤隅朝莫一
艇暑寒一簾老魚鼈而為命狎鷗鷺而不孤久與世以
相忘亦傷今而欲痛大夫方將謝軒冕樂樵漁儂玄機
兮相高庶嘉邈兮不渝今儂有粳可炊有酒可沽幸江

山兮如待祈風月兮無辜大夫為之欣然曰若子者是
豈以蟹為業者歟非渭水之遺智必山澤之脩廕深樂
其言藏道於愚欲去兮徘徊欲逝兮勤渠舉酒酬酢道
古哀歡與之釋縛為之拍桴剗甲如山壅橙如舖意悟
忘言酒深相扶指青天兮自誓幸來世兮知予眇煙水
兮莫流迅孤舟兮長呼蟹翁者三歎於邑四顧躊躇揖
長江而如矢聆浩歌而莫能俱其歌曰天高兮月寒天
風兮水急鴻遠兮汲汲人有慕兮何歎及老霜澤兮遺

漁斷有蟹兮鼠有魚酒答天兮天知予子不得兮愁如
何又歌曰洞庭兮既波松江兮未雪一舸兮自決知者
樂兮樂者哲蟹健兮魚肥風吹觴兮酒淋衣知有蟹兮
不知時若斯人兮其庶幾

雲林賦

元
袁
桷

若知雲乎昭昭然服光以廣微隆然廓然又似夫五色
萬物而沈幾來弗以趾去弗以馳其始也盤辟夾輔輪
輪困困孰合其處所其終也寸芒以興導轟轟啓鈴鈴

汨沮如襄丘陵若慕而佇若泣而赴愀兮哀不知所訴
蛺蝶渺緜含英吐鮮道傾蓋而忘返粲接席以爭先誠
果樂乎莫與之宣形成乎無形名生於有名囿於家林
允為儀刑奉著占之曰居高而卑佩矩帶規升於木無
往不復不泄不辱言歸其谷伊南維湖將以為居齋三
日祝而泣諸蓍兮中峰式瞻其端為章為祥為輪為冠
風以潤之雨以需之挾陰而噓乘陽而舒朝飛夕躋莫
窮其栖有翼者鵠遵於其涯曰將有行自東徂西綏而

迎之維墉之崇施而流之維泉之通以沐以容是謂雲
林之宮

閒艤賦

元 陳 樵

融火向中余方慎夏接葉罷亭依山忘榭麗草長林未
卜與夜臨池館水不怡陰厦伊清池之蹇淺兮覺水氣
之已多蔭諼草而翳蘭兮結斯構之叢叢疏堂屬其南
垂清陰生其四阿杜予門而却埽兮日長往乎滄波招
招緒風持雲沐露窮夜為日迄於闌暑余凌波而雅步

兮魚鱗鱗其在下若停梳之萬斛當步忉之秋浦朱塵
倒景若閭而飛疏箔懸繒五兩萎蕤燕循檣而失據鳬
就槩而無依不纜而維不柅而安承艫絕後接舳無前
四載不服萬夫莫前亡余櫂之蘭桂廢余梳之芳荃又
若委陋舟而弗御猶誕寔之河漢也蔭斯亭以宴處兮
瞻浮榮之翔翥文謝杏梁珍慙桂戶藻離棟而成妍題
去櫳而加眎銀榜昭其碧鏤皓壁煜以振素波塵屬跋
雲松薦礎澤葵生閣蘋花照藥浮萍附躡雕胡承梧愛

芙蓉之婉婉兮藉初日之明輝色潋灩於顏間蔚藻繪
之備施傾蓋成陰聯袂成帷含芳揚烈茹華吐奇當筵
薦綺在檻成梯映朱鷺之芳翰增翠羽之綠姿啼鶯在
柳媚蝶時來爾乃御緇締攬蕉荃肆莞翳燎芳蘭緝靈
草以為躋緯楚竹以為冠白紵微舉芳風可握或進壺
投矢投瓊擊博或從橫竹素佃漁六學或左設鷗夷右
操釣具蓑笠長拋岑簪不御屑桂垂芳聚粒為茹投八
絲之翠綸沈百囊之綬畧於是丹鯉含腴蓮的豐甘葵

葉初肥綠杞闌干山膚陸芼華果具繁張飲命客觴政
在前蕉葉無奇金舳猶窄折葉薦芳引筒分碧挹蘭英
之春醪醺玉薤之芳液洗慮延歡祇以永日雅歌清吹
與舟俱浮合樽促席敷衽綢繆今夕何夕與子同舟抱
月坐花藉以蘋蘩視夜參平衡漢迴薄情盤景遽賓客
益樂乃起而為扣舷之歌歌曰世冥冥兮塵汚人慕前
烈兮凌青雲食有魚兮藟有蓴願投老兮守丘林座客
聞之又稱歌曰卉服兮舟居荷為屋兮桂為祛宿沙子

之徒歟江上丈人之徒歟

樵雲賦

元涂幾

石田荒蕪清溪罷漁嗟吾行兮安之乃於樵而是圖執
彼斧斤往來崎嶇苔磴霜寒株林葉枯爰採掇乎薪蒸
釋勤勞於僕夫鬱鬱高岡浮雲是紆翳晴光於木末散
微潤於衣裾冉冉人起濛濛鳥呼忽丁丁之可聞辨崖
嶺之模糊歲既宴兮無與歸唐虞世兮忽已徂高車駟
馬兮吁可哀舍吾樵兮何所如彼條彼枚維械維櫜既

食力之無災乃全生而有餘重為之歌曰樵之人兮返
龐淳兮我思其儔無慚葛天氏之民兮

耦耕賦

有序

元涂幾

僕宜黃之鄙人也雖讀書績文而心非所好一日行臨
川山中聞田歌依依而樂之賦耦耕一章以見志

步天風兮振羽忽余行乎高阻葉翳翳兮垂陰水濺濺
兮橫路懷田中之耦耕激商歌於太古婦饁黍兮在途
兒編蒲兮當戶悲黃唐之日遠孰返淳而還素儻斯人

之可儔吾將犁兮春雨

藥市賦

明楊慎

蓬丘仙伯七刀圭而通神柰園老宿品千二而稱珍何
如蓉城之日重開藥市之春若夫岐摯湯液和緩灑溲
采嘉林之嘉草掇芳洲之芳羞屏風水發書帶山抽人
參二極來自高句麗之國桃枝九折出於崑崙之陬
椒聊下虛星之舍果蓏薦織女之樓蓬茅龍之衛叔遇
木羊之葛由檢本草之聖錄極山海之冥搜別有天棘

日精澤葵海藻火林之蔚炎柯雪津之濯陽草款冬叩
冰而吐葩葶蘆迎露而先槁青綸碧組蒼龍就食於甲
辰素茵皓陳白兔騰仙於辛卯帝休鬼麗蕩邪而蠲憂
神錦仙鹽駐顏而難老又不若剗犀截角擗翠刪毛澄
禺山之水碧醴樊桐之金膏鮫人泣珠而酬價狼臙龔
金而解橐神鹿兩頭飲上池之水靈鳥四翼歸金匱之
韜莫不攀丹危而陟翠險竇仙的而下神囂涉淼淼馳
革革刈翹翹伐丁丁香草比於君子嘉卉方於女貞藤

名簡子花號長卿五芝色配乎五嶽六飲芳冠乎六清
乃延巫彭招長桑飛絳雪擣玄霜巴戎赤斧梓谷王昌
蓬州塗定辭玄武張開光希夷出崇龕之落真多栖葛
瓚之鄉黃足之鳥呼季玉而並復朱頂之鶴名令威而
駢翔負局磨鏡之翁籊桶講易之叟扶龜牀於行阿策
鳩杖於林藪嚴遵之芳乳平分王列之香膏共剖是月
也江波錦落火井星還楓瑟瑟而鳴籟菊英英而綴斑
訪名跡於古昔啓藥市於重關被開明廣都之野帶杜

宇天隳之山哀危螭於寸陰矜局鼃於井谷布護天府
之區蔓衍坤維之域八萬四千之人煙五十四州之謡
俗國無夜戶之虞人有春臺之燠邵公程鄭之倫驥子
魚文之服乍發劑以鍼龍奄飛符而擒蜮黃耆背鮐蒼
崽髻蝸行歌擊壤羣嬉聚沙成行鴈鴈學語鴉鴉毛姬
餌葉鳳子藏花色輝九壁之錦光漾百潭之霞採思婦
之卷耳折放臣之疎麻息風枝之不靜起露蓼之含嗟
崔公之鏡云遠華陀之囊已遐既富矣韓康之肆寧靳

乎博望之槎揚雄夢腸頓醒滯思於雕篆相如消渴歛
蠲沈疴於齒牙豈知西顙之盤露北方之河車哉有林
間翁孺者起而為系曰黃熊兮休入寢朱羆兮罷窺屏
永遯兮二豎載殲兮九嬰分菊潭兮澹澹宴蓉城兮冥
冥鴻安丘繼而作曰安期神樓散扁鵲陷冰丸銀筒昔
誰蘊金瓶今子殫謝驚飈兮駐流電訪大藥兮浴還丹
邀錢俛兮雀躍共喬松兮鯢桓主人聞之欣然稱蘭修
容麗級獻壽升筵敬緝光誦奉以周旋

御定歷代賦彙外集卷十三

欽定四庫全書

御定歷代賦彙外集卷十四

美麗

高唐賦

有序

周

宋玉

昔者楚襄王與宋玉游於雲夢之臺望高唐之觀其上
獨有雲氣崑兮直上忽兮改容須臾之間變化無窮王
問玉曰此何氣也玉對曰所謂朝雲者也王曰何謂朝
雲玉曰昔者先王嘗遊高唐怠而晝寢夢見一婦人曰

妾巫山之女也為高唐之客聞君游高唐願薦枕席王
因幸之去而辭曰妾在巫山之陽高丘之岨旦為朝雲
暮為行雨朝朝暮暮陽臺之下旦朝視之如言故為立
廟號曰朝雲王曰朝雲始出狀若何也王對曰其始出
也暉兮若松櫨其少進也晰兮若姣姬揚袂鄣日而望
所思忽兮改容偕兮若駕駟馬建羽旗湫兮如風淒兮
如雨風止雨霽雲無處所王曰寡人方今可以游乎王
曰可王曰其何如矣王曰高矣顯矣臨望遠矣廣矣普

矣萬物祖矣上屬於天下見於淵珍怪奇偉不可稱論
王曰試為寡人賦之玉曰唯唯

惟高唐之大體兮殊無物類之可儀比巫山赫其無疇
兮道互折而曾累登巉巖而下望兮臨大隄之穠水遇
天雨之新霽兮觀百谷之俱集漚洶洶其無聲兮潰淡
淡而並入滂洋洋而四施兮翕湛湛而不止長風至而
波起兮若麗山之孤畝勢薄岸而相擊兮隘交引而却
會倅中怒而特高兮若浮海而望碣石礫礫礫而相摩

兮嶒震天之磕磕巨石溺溺之澆澆兮沫潼潼而高厲
水澹澹而盤紆兮洪波淫淫之溶溶奔揚踊而相擊兮
雲興聲之需需猛獸驚而跳駭兮妄奔走而馳邁虎豹
豺兕失氣恐喙鵬鷃鷄飛揚伏竄股戰脇息安敢妄
挈於是水蟲盡暴乘渚之陽鼃鼃鱣鮪交積縱橫振鱗
奮翼蜃蜃蛭蛭中阪遙望玄木冬榮煌煌熒熒奪人目
精爛兮若列星曾不可殫形榛林鬱盛葩葉覆蓋雙椅
垂房糾杖還會徙靡澹淡隨波閭謁東西施翼猗猗豐

沛綠葉紫裹朱莖白蒂纖條悲鳴聲似竽籟清濁相和
五變四會感心動耳迴腸傷氣孤子寡婦寒心酸鼻長
吏隳官賢士失志愁思無已歎息垂淚登高遠望使人
心瘁盤岸嶺屹振陳磴磴磐石險峻傾崎崖隕巖崕叅
差縱橫相追蹙互橫梧背穴偃蹠交加累積重疊增益
狀似砥柱在巫山之下仰視山巔肅何芊芊炫燿虹蜺
俯視峭嶸室寥窈冥不見其底虛聞松聲傾岸洋洋立
而熊經久而不去足盡汗出悠悠忽忽怛悵自失使人

心動無故自恐賁育之斷不能為勇卒愕異物不知所
出縱縱莘莘若生於鬼若出於神狀似走獸或象飛禽
譎詭奇偉不可究陳上至觀側地蓋底平箕踵漫衍芳
草羅生秋蘭芷蕙江離載菁青荃射干揭車苞并薄草
靡靡聯延夭夭越香掩掩衆雀嗷嗷雌雄相失哀鳴相
號王雎鸛黃正冥楚鳩婦歸思婦垂雞高巢其鳴喈喈
當年遨遊更唱迭和赴曲隨流有方之士羨門高谿上
成鬱林公樂聚穀進純犧禱璇室醮諸神禮太一傳祝

已具言辭已畢王迺乘玉輿駟蒼螭垂旒旌旆合諧絢
大弦而雅聲流冽風過而增悲哀於是調謳令人怵候
惜悽脇息增欬於是迺縱獵者基趾如星傳言羽獵銜
枚無聲弓弩不發罟罟不傾涉潏潏馳革革飛鳥未及
起走獸未及發弭節奄忽蹄足灑血舉功先得獲車已
實王將欲往見之必先齋戒差時擇日簡輿玄服建雲
旆蜺為旌翠為蓋風起雨止千里而逝蓋發蒙往自會
思萬方憂國害開賢聖輔不逮九竅通鬱精神察滯延

年益壽千萬歲

卷十四

神女賦

有序

周 宋 玉

楚襄王與宋玉遊於雲夢之浦使玉賦高唐之事其夜
王寢夢與神女遇其狀甚麗王異之明日以白玉玉曰
其夢若何王對曰晡夕之後精神恍惚若有所喜紛紛
擾擾未知何意日色髣髴乍若有記見一婦人狀甚奇
異寐而夢之寤不自識罔兮不樂悵爾失志於是撫心
定氣復見所夢玉曰狀如何也王曰茂矣美矣諸好備

矣盛矣麗矣難測究矣上古既無世所未見瓌姿瑋態
不可勝贊其始來也耀乎如白日初出照屋梁其少進
也皎若明月舒其光須臾之間美貌橫生煜兮如花溫
乎如瑩五色並馳不可殫形詳而視之奪人目精其盛
飾也則羅紈綺縠盛文章極服妙彩照萬方振繡衣被
袿裳穠不短纖不長步裔裔兮曜殿堂忽兮改容婉若
游龍乘雲翔嬋被服僂薄裝沐蘭澤含若芳性和適宜
侍旁順序卑調心腸王曰若此盛矣試為寡人賦之王

曰唯唯

夫何神女之姣麗兮含陰陽之渥飾被華藻之可好兮
若翡翠之奮翼其象無雙其美無極毛嫱鄠袂不足程
式西施掩面比之無色近之既妖遠之有望骨法多奇
應君之相視之盈目孰者克尚私心獨悅樂之無量交
希恩疎不可盡暢他人莫覩王覽其狀其狀我我何可
極言貌豐盈以莊姝兮苞溫潤之玉顏眸子炯其精朗
兮瞭多美而可觀眉聯娟似蛾揚兮朱脣的其若丹素

質幹之醲實兮志解泰而體閑既婉孌於幽靜兮又婆娑乎人間宜高殿以廣意兮翼放縱而綽寬動霧縠以徐步兮拂墀聲之珊珊望余帷而延視兮若流波之將瀾奮長袖以正衽兮立躑躅而不安澹清靜其惜嫵兮性沈詳而不煩時容與以微動兮志未可乎得原意似近而既遠兮若將來而復旋褰余幃而請御兮願盡心之惓惓懷貞諒之潔清兮卒與我乎相難陳嘉辭而云對兮吐芬芳兮其若蘭精交接以來往兮心凱康以樂歡

神獨享而未結兮魂煢煢以無端含然諾其不分兮喟
揚音而哀歎顏薄怒以自持兮曾不可乎犯干於是搖
珮飾鳴玉鸞整衣服斂容顏顧女師命大傳歡情未接
將辭而去遷延引身不可親附似逝未行中若相首目
略微眄精彩相授志態橫出不可勝記意離未絕神心
怖覆禮不遑訖辭不及究願假須臾神女稱遽徊腸傷
氣顛倒失據闇然而冥忽不知處情獨私懷誰者可語
惆悵垂涕求之至曙

神女賦

魏陳琳

漢三七之建安荆野蠢而作仇贊皇師以南假濟漢川
之清流感詩人之攸歎想神女之來遊儀營魄於髣髴
託嘉夢以通精望陽侯而滉漾覩玄麗之軼靈文絳蚪
之奕奕鳴玉鸞之嚶嚶荅玉質於苔華擬艷姿於薜榮
感仲春之和節歎鳴雁之噉噉申握椒以貽予請同宴
乎奧房苟好樂之嘉合永絕世而獨昌既歎爾以豔采
又悅我之長期順乾坤以成性夫何若而有辭

神女賦

魏王粲

惟天地之普化何產氣之淑真陶陰陽之休液育天麗之神人稟自然以絕俗超希世而無羣體纖約而方足膚柔曼以豐盈髮似玄鑑鬢類刻成質素純皓粉黛不加朱顏熙曜暉若春華肩臂含丹目若爛波美姿巧笑靨輔奇牙戴金羽之首飾珥照夜之珠璫襲羅綺之黼衣曳縟繡之華裳錯續紛以雜桂佩熠爚而焜煌退變容而改服冀致態以相移稅衣裳兮免簪笄施華的兮

結羽儀揚蛾微盼懸眇流離婉約綺媚舉動多宜稱詩
表志安氣和聲探懷授心發露幽情彼佳人之難遇真
一遇而長別顧太罰之淫愆亦終身而不減心交戰而
貞勝乃回意而自絕

神女賦

魏
楊修

惟玄媛之逸女育明曜乎皇庭吸朝霞之芬液澹浮遊
乎太清余執義而潛厲乃感夢而通靈盛容飾之本豔
與龍采而鳳榮翠黼翬裳纖縠文袿順風揄揚乍合乍

離飄若興動玉趾未移詳觀玄妙與世無雙華面玉粲
韡若芙蓉膚凝理而瓊潔體鮮弱而柔鴻回肩襟而動
合何俯仰之妍工嘉今夜之幸遇獲帷裳乎期同情沸
踊而思進彼嚴厲而靜恭微諷說而宣諭色歡懌而我
從

神女賦

有序

晉張敏

世之言神仙者多矣然未之或驗也至如絃氏之婦則
近信而有證者夫鬼魅之下人也無不羸病損瘦迺平

安無恙而與神女飲宴寢處縱情極意豈不異哉予覽其歌詩辭旨清偉故為之作賦

皇覽予之純德步朱闕之崢嶸靡飛除而入祕殿侍太極之穆清帝愍予之勤肅將休予於中州託玄靜以自處是夫子之好仇於是主人憮然而問之曰爾豈是周之褒姒齊之文姜孽婦淫鬼來自藏乎儻亦漢之游女江之娥皇厭貞樂愆倦仙侍乎於是神女乃斂袂正襟而對曰我實貞淑子何猜焉且辯言知禮恭為令則美

姿天挺盛飾表德以此承歡君有何惑爾乃敷茵席垂
組帳嘉旨既設同牢而饗微聞芳澤心蕩意放於是尋
房中之至嬾極長夜之歡情心眇眇以忽忽想北里之
遺聲賦斯時之要妙進偉服之紛數俛撫衽而告辭仰
長歎以歛吁乘雲霧而變化遙棄我其焉如

水上神女賦

梁江淹

江上丈人遊宦荆吳首衛國望燕途歷秦關出宋都遍
覽下蔡之女具悅淇上之妹未有粉白黛黑鬼神之所

無也迺造南中渡炎洲逕玉碕越金流路逶迤而無軌
野忽泮而眇儔山反覆而參錯水遶灌而縈薄石五采
而橫峰雲千色而承萼日炯炯而舒光雨屑屑而梢落
紫莖繞逕始參差紅荷緣水纔灼爍忽而精飛眎亂意
徙心移綺靡菱蓋悵望蕙枝一麗女兮碧渚之崖曖曖
也非雲非霧如煙如霞諸光諸色雜卉雜華的的也為
珪為璧若虛若實綾錦共文瑤貝合質遂乃紅脣寫朱
真眉學月美目豔起秀色爛發窈窕暫見偃蹇還沒冶

異絕俗奇麗不常青娥羞豔素女慚光笑李后於漢主
恥西施於越王神翻覆而愉悅志離合而感傷女遂俯
整玉軼仰肅金鑣或採丹葉或拾翠條守明璣而為誓
解琅玕而相要情乍合而還散色半親而復嬌聳駟車
於水際亭雲霓於山椒奄神祇之仿像共光氣而寂寥
於時也綵霞繞繞卿雲縵縵石瓊文而翕艷山龍鱗而
焰爛苔綠根而攢集草紅葩而舒散日炫晃以朧光樹
歲蕤而葱繁無西海之浩蕩見若木之千尋非丹山之

赫曦聞琴瑟之空音理洞徹於俗聽物驚怪於世心恨
精影之不滯悼光晷之難惜閱有無於俄頃驗變化於
咫尺視空同而失貌察儵忽而無迹野田田而虛翠水
湛湛而空碧迺唱桂櫂凌衝波背橘浦向椒阿砮斲木
石洪漭蛟鼉顧御僕而情饒巡左右而怨多弔石渚而
一歎悵沙洲而少歌苟懸天兮有命永離決兮若何遂
以為妙聲無形奇色非質麗於嬪嬙精於琴瑟尋漢女
而空佩觀清角而無匹嬪楊不足聞知夔牙焉能委悉

何如明月之忌玄雲秋露之慙白日愁知形有之留滯
非英靈之所要術也

洛神賦

有序

魏

曹

植

黃初三年余朝京師還濟洛川古人有言斯水之神名
曰宓妃感宋玉對楚王神女之事遂作斯賦其辭曰

余從京師言歸東藩背伊闕越轅轅經通谷陵景山日
既西傾車殆馬煩爾乃稅駕乎衡皋秣馱乎芝田容與
乎楊林流眄乎洛川於是精移神駭忽焉思散俯則未

察仰以殊觀覩一麗人於巖之畔爾乃援御者而告之
曰爾有覲於彼者乎彼何人斯若此之豔也御者對曰
臣聞河洛之神名曰宓妃則君王之所見也無迺是乎
其狀若何臣願聞之余告之曰其形也翩若驚鴻婉若
游龍榮曜秋菊華茂春松髣髴兮若輕雲之蔽月飄颻
兮若流風之迴雪遠而望之皎若太陽升朝霞迫而察
之灼若芙蕖出淥波穠纖得中脩短合度肩若削成腰
如約素延頸秀項皓質呈露芳澤無加鉛華不御雲髻

我我脩眉聯娟丹脣外朗皓齒內鮮明眸善睐靨輔承
權瓊姿豔逸儀靜體閑柔情綽態媚於語言奇服曠世
骨像應圖披羅衣之璀璨兮珥瑤碧之華琚戴金翠之
首飾綴明珠以耀軀踐遠遊之文履曳霧綃之輕裾微
幽蘭之芳藹兮步踟躕於山隅於是忽焉縱體以遨以
嬉左倚采旄右蔭桂旗攘皓腕於神許兮采湍瀨之玄
芝余情悅其淑美兮心振蕩而不怡無良媒以接歡兮
託微波而通辭願誠素之先達解玉珮而要之嗟佳人

之信修羌習禮而明詩抗瓊瑋以和予兮指潛淵而爲
期執眷眷之款實兮懼斯靈之我欺感交甫之棄言兮
悵猶豫而狐疑收和顏而靜志兮申禮防以自持於是
洛靈感焉徙倚傍徨神光離合乍陰乍陽竦輕軀以鶴
立若將飛而未翔踐椒塗之郁烈步蘅薄而流芳超長
吟以永慕兮聲哀厲而彌長爾迺衆靈雜遝命儔嘯侶
或戲清流或翔神渚或采明珠或拾翠羽從南湘之二
妃攜漢濱之游女歎匏瓜之無匹詠牽牛之獨處揚輕

桂之綺靡翳脩袖以延佇體迅飛鳧飄忽若神凌波微
步羅韞生塵動無常則若危若安進止難期若往若還
轉眄流精光潤玉顏含辭未吐氣若幽蘭華容婀娜令
我忘餐於是屏翳收風川后靜波馮夷鳴鼓女媧清歌
騰文魚以警乘鳴玉鸞以偕逝六龍儼其齊首載雲車
之容裔鯨鯢踊而夾轂水禽翔而為衛於是越北沚過
南岡紆素領迴清揚動朱脣以徐言陳交接之大綱恨
人神之道殊兮怨盛年之莫當抗羅袂以掩涕兮淚流

襟之浪浪悼良會之永絕兮哀一逝而異鄉無徵情以
效愛兮獻江南之明璫雖潛處於太陰長寄心於君王
忽不悟其所舍悵神宵而蔽光於是背下陵高足往神
留遣情想像顧望懷愁冀靈體之復形御輕舟而上汴
浮長川而忘返思緜緜而增慕夜耿耿而不寐霑繁霜
而至曙命僕夫而就駕吾將歸乎東路攬騑轡以抗策
悵盤桓而不能去

江妃賦

宋
謝靈運

招魂定情洛神清思覃曩日之敷陳盡古來之妍媚矧
今日之逢迎邁前世之靈異姿非定容服無常度兩宜
歡顰俱適華素於時升月隱山落日映嶼收霞斂色迴
飈拂渚每馳情於晨暮矧良遇之莫敘投明珠以申贈
覲色授而魂與沈分湘岸延情蒼陰隔山川之表裏判
天地之浮沈承佳約於往昔寧更貳於在今儻借訪於
交甫知斯言之可謔蘭音未吐紅顏若暉留眄光溢動
袂芳菲散雲轡之絡繹按靈輜而徘徊建羽旌而逶迤

奏清管之依微慮一別之長絕眇天末而永違

江妃賦

宋 謝靈運

小腰微骨朱衣皓齒絳視騰采靡容膩理出月隱山落
日映嶼收霞斂色迴飈拂渚每馳情於晨暮矧良遇之
莫敘投明珠以申贈覲色授而魂與嗟佳人之眇邁睡
霄際而告語懼展愛之末期抑傾念而暫佇天台二娥
宮亭雙媛青桂神接紫衣形見或飄翰凌烟或潛泳浮
海萬里俄頃寸陰未改事雖假於雲物心常得於無待

江妃賦

有序

明 俞安期

鄭交甫客遊於楚星紀載期邈焉索處忽焉以嬉邁彼
江妃於漢之涯微辭相感謫乎見紿懷珮既失靈跡莫
追五色無主累日歔歔王聞而召見命抽緒而賦之乃
湛思其授受髣髴其風儀爰濡毫而引牘遂揆藻而敷
辭其辭曰

粵青衿之發春兮草木菀而華生
倉庚熠其振羽兮翟
鳴鳶而飛鳴羌余有烟煴之思兮
若昧旦欲辯而未明

聊紓徐以遊步兮寫羈懷之怲怲遂乃遵修術履神區
江之皋城之隅或蕩心以遐矚或寄目而踟躕休乎漢
南之喬木覲彼東門之如荼帷裳成塞鉛黛成林笑言
諧謔亦各有心班坐雜遝匪我所欣復有二妹未至遵
彼微行遺視成采揚顏施光姱容特顯態無定方劃兮
若排積晦而燭龍吐耀恍乎若擁卿雲而文鳳驚翔其
輕弱也絳氣游采叢霄中其清映也朗月流景方諸宮
其狀則曲翠隨眉波溢背頰脣欲合瓠犀微翳膚肉

似豐骨法且細屈髻如玦髻尾如蜚螭鬚聿修不屑施
髻鬢暈瓊藻氣吐玉蕤皦非凝粉澤豈塗脂步珠塵而
不動倚條楊而不敬仰若寄傲俯若銜思衆妍屢變若
合若離其飾則寶葉扶鬟鏐蕊承足繩璣絡臂裁碧耀
目鞞帶飛飛香纓馥馥簪以黃支之犀曳以苔華之玉
纖紉致乎東齊明錦濯乎西蜀金縷芸黃離羅微綠腰
約綺裳項圍繡褱袂舉揚綃襟垂掩縠表裏交映參差
相屬其佩則北荒之明月木難之夜光英英粲粲焜焜

煌煌鑒容益媚當暑昭涼爾乃躑行則芳躅並進少頃
則衫袂交聯雙顏合美異體同妍迴飈欲舉皓腕相牽
既振迅以辭避復矜顏而迴旋若將迎而欲却類含意
而待宣余斯時也目轉注而不定魂搖曳而翩翩欲迫
之而恐逝懼招之而不前冀承間而送款復投會以告
虔歌曰遭子於漢之皋兮我心勞兮願有要兮子之佩
爛昭昭兮於是麗姝安軌正儀情會體近步整若遲履
輕若敏解彼明珠爰赴所請口鮮違辭色無微愠舉而

授受其光清炯握之分明懷之諦審既而意警神超氣
愉願適行纔十步時僅頃刻再探懷中佩已旋失劍云
善亡珠豈生翼回瞻麗姝亦不可覲即蹇修無由以通
辭象罔不可以求索矣羲輪既頽望舒將御竚立愀惘
尚希神遇居人間之余告之故彼曰噫嘻此江妃也出
而遨遊不可述也人祇異軌毋爾思也始乃循來陌曳
歸策頽蘊勃趾蹢躅疑結夢之乍還逮銜憾而未釋楚
王曰子懷惇惇亦既勞止楚國雖隘幅員千里豈無其

人惟肖彼美試求得之願以賜予

息夫人不言賦

以此人不言其義安在為韻

唐

白敏中

有一人兮甚美事二夫兮深恥不咄咄以怨人常默默而傷已何窈窕兮若彼而寂寞兮如此古雖在而口不言身未亡而心已死殆其喪主失身去故從新初為息侯之婦今為楚國之嬪標二八之佳麗冠三千之等倫豈君恩之不至顧我恨之有因觸類無言似峽口為雲之女含情不語如山頭化石之人守而不改邈矣而心

有所在行之實難確乎而性有所安指逝波於舊寵比
浮雲於新歡得不佇蕙思於心曲祕玉聲於舌端於是
語笑已而得意莫其處喧譁而不亂挺節操以自持翠
羽常低多值斂眉之日瓠犀難見少逢啟齒之時然則
動宜三省情順九思似慎樞機暗合吉人之象類含鋒
刃潛符靜女之詩嗟夫秦家之女兮在德何有賈氏之
妻兮其言亦苟誰令喋喋駐五馬而誚使君之愚焉用
嘻嘻獲一雉而忘大夫之醜彼則爾此則否外結舌而

內結腸先指心而後指口既而載離生育幾變寒暄想
靡蕪之不見厭芣苢之空繁勢異絲蘿徒新婚而非偶
華如桃李雖結子而無言及夫雲夢春遊章華夜侍永
忘一顧之念難奪三緘之志起居有節惟聞珮玉之聲
應對無時不吐如蘭之氣君王於是崇其意重其義命
女史以書之為楚宮之故事

勾踐進西施賦

以紅顏豔色返
以昏哉為韻

唐 徐 寅

惑人之心兮惟巧惟僭破人之國兮以妖以豔當勾踐

之密謀進西施而果驗昔者二國相吞陵卑恃尊殊不知卑則自亡而固存尊則謂明而返昏烏喙年年誓戮夫差之肉稽山日日拜聽范蠡之言言曰伍員之賢東吳之德伯嚭之佞東吳之賊德之盛兮越可憂賊之興兮吳可殛臣以夙夜而計機謀偶得欲狂敵國之君須中傾城之色待其聲色內伐君臣外惑自然紂妲己以亡宗晉驪姬而亂國今苧蘿之山越水之彎恐是神仙之化忽生桃李之顏波淺丹臉鴉深綠鬟顰翠黛兮慘

難效浣輕紗兮妖且閑楊柳羞弱芙蓉死毀可以變柳
惠於貞莊之際悅荆王於魂夢之裏臣請進焉王今何
以王乃豁若而喜矍然而起曰此蓋神假卿之奇畫天
雪越之前恥乃命寶馬騰龍香車碾風迎織女於銀漢
聘姮娥於月宮炫耀雲外喧闐洞中妝成而瑞玉凝彩
服麗而朝霞翦紅昨日猶賤今晨不同寧期大國之君
流恩下及堪恨鄰家之婦謂妾常窮曉別越溪暮歸吳
苑越慮計失吳嫌進晚歌一聲兮君魄醉笑百媚兮君

心卷坐令佞口因珠翠以興言立遣謀臣棄洪濤而不
返勾踐乃走電驅雷星馳箭催投醪而士卒皆醉嘗膽
而胃襟洞開虎噬骨碎山崩卵摧楚腰衛鬢化為鬼鳳
閣龍樓燒作灰於是命屠蘇之酒上姑蘇之臺伊霸業
以何去俄英風而聿來於戲殺忠賢而受佳麗欲不敗
而難哉

長門賦

有序

漢司馬相如

孝武皇帝陳皇后時得幸頗妒別在長門宮愁悶悲思

聞蜀郡成都司馬相如天下工為文奉黃金百斤為相
如文君取酒因干解悲愁之辭而相如為文以悟主上
皇后復得幸其辭曰

夫何一佳人兮步逍遙以自虞魂踰佚而不返兮形枯
槁而獨居言我朝往而暮來兮飲食樂而忘人心嫌移
而不省故兮交得意而相親伊余志之慢愚兮懷貞慙
之歡心願賜問而自進兮得尚君之玉音奉虛言而望
誠兮期城南之離宮修薄具而自設兮君曾不肯兮幸

臨廓獨潛而專精兮天飄飄而疾風登蘭臺而遙望兮
神怳怳而外淫浮雲鬱而四塞兮天窈窕而晝陰雷隱
隱而響起兮聲象君之車音飄風迴而赴閨兮舉帷幄
之檐檐桂樹交而相紛兮芳酷烈之閭闔孔雀集而相
存兮玄猿嘯而長吟翡翠脅翼而來萃兮鸞鳳飛而北
南心憑噫而不舒兮邪氣壯而攻中下蘭臺而周覽兮
步從容於深宮正殿塊以造天兮鬱並起而穹崇間徙
倚於東廂兮觀夫靡靡而無窮擠玉戶以撼金鋪兮聲

曾吟而似鍾音刻木蘭以為櫟兮飾文杏以為梁羅丰
茸之游樹兮離樓梧而相撐施瑰木之構櫨兮委參差
以棟梁時髣髴以物類兮象積石之將將五色炫以相
曜兮煥爛煜而成光綴錯石之瓊甍兮象瑤瑤之文章
張羅綺之幔帷兮垂楚組之連網撫柱楣以從容兮覽
曲臺之央央白鶴數以哀號兮孤雌跼於枯楊日黃昏
而望絕兮悵獨託於空堂懸明月以自照兮徂清夜於
洞房援雅琴以變調兮奏愁思之不可長案流徵以卻

轉兮聲幼妙而復揚貫歷覽其中操兮意慷慨而自印
左右悲而垂淚兮涕流離而縱橫舒息悵而增歆兮蹤
履起而彷徨揄長袂以自翳兮數昔日之讐殃無面目
之可顯兮遂頽思而就牀搏芬若以為枕兮席荃蘭而
茝香忽寢寐而夢想兮魂若君之在傍惕寐覺而無見
兮魂迢迢若有亡衆雞鳴而愁予兮起視月之精光觀
衆星之行列兮畢昴出於東方望中庭之藹藹兮若季
秋之降霜夜曼曼其若歲兮懷鬱鬱其不可再更澹偃

蹇而待曙兮荒亭亭而復明
妾人竊自悲兮究年歲而不敢忘

陳皇后因賦復寵賦

唐黃滔

陳皇后一鎖長門蕭條渥恩欲寫退宮之永恨因求體物之嘉言蜀郡才高述遺芳於桃李漢皇心感歸舊職於蘋繁想夫跡墜城南寵移天顧難期獻繭於春晝不忍解簪於日暮瓊樓寂寂空高於明月秋風瑤草萋萋莫輟於金輿玉輅於此蓄憤夫何釋情犀浦有多才之

著上林推獨步之名沽酒而居每樂當壚之事量金以
至爰流擲地之聲於是摘妍詞貌濃黛侔錦字陳綺態
鬱芬馥於茵席悄丁當於珠珮鵲巢入構翻成別鶴之
悲馬首虛瞻不識牽牛之會振動文苑旋彰國朝既切
採靡於藻麗遂牽連理於桃夭一旦惻聖鑒錫嘉昭已
無為雨之期空懸夢寐終自凌雲之製能致煙霄莫不
傾北園駭南國絲羅而昨日靡託珠翠而今朝改色玉
臺有恨舞鸞之影孤來金闕無恩吐鳳之才雙得設使

幸望顯若含情默然擢髮同論於漢殿揮毫莫購於巴
川則此日前魚定作小鱗而赴海寧令破鏡卻成圓月
以昇天懿夫揆天之手雖奇麗水之珍可博苟非茲賦
之讚詠奚救當時之黜削方今妃后悉承歡不是後賢
無此作

李夫人賦

漢武帝

美連娟以脩嫿兮命櫟絕而不長飾新宮以延佇兮泯
不歸乎故鄉慘鬱鬱其蕪穢兮隱處幽而懷傷釋輿馬

於山椒兮奄修夜之不陽秋氣憊以淒淚兮桂枝落而
消亡神覺覺以遙思兮精浮游而出疆託沈陰以曠久
兮惜蕃華之未央念窮極之不還兮惟幼眇之相羊函
茝蒻以俟風兮芳雜襲而彌章的容與以猗靡兮縹飄
姚庠愈莊燕淫衍而撫楹兮連流視而蛾揚既感激而
心逐兮包紅顏而弗明驪接押以離別兮宵寤夢之芒
芒忽遷化而不反兮魄放逸以飛揚何靈魂之紛紛兮
哀裴徊以躊躇執路日以遠兮遂荒忽而辭去超兮西

征肩兮不見寢淫敞菟寂兮無音思若流波怛兮在心
亂曰佳俠苗光隕朱榮兮嫉妬闌茸將安程兮方時隆
盛年夭傷兮弟子增歎洙沫悵兮悲愁於邑喧不可止
兮嚮不虛應亦云已兮嫵妍太息歎稚子兮慟慄不言
倚所恃兮仁者不誓豈約親兮既往不來申以信兮去
彼昭昭就冥冥兮既下新宮不復故庭兮嗚呼哀哉想
魂靈兮

擬漢武帝李夫人賦

宋孝武帝

觀周氏之逸篇覽漢室之遺篆弔新宮之掩映嗟壁臺
之蕪踐雖媛德之有載竟滯悲其何遣念桂枝之秋實
惜瑤華之春翦彤殿閒兮素塵積翠祀蕪兮紫苔生寶
羅暘兮春幌重珍簾空兮夏幃扃秋臺惻兮碧煙凝冬
宮冽兮朱火清流津有終深心無歇徙倚雲日徘徊風
月思玉步於鳳墀想金聲於鸞闕

漢武帝重見李夫人賦

以求諸異術再
見真形為韻

唐陳山甫

昔漢武帝喪李夫人歎妍婉兮不返悲總帳兮空陳於
是詔祕錄之方士致平生之幻身來其跡於虛無初驚
有象察其儀之婉麗已訝如真時也齋心月殿屬目蘭
室髣髴烟光飄飄蕙質脩蛾再覩不俟返魂之香逝水
潛迴詎假長生之術原夫恍惚之際從容視諸想車塵
於霧眇疑珮響於風餘峨峨兮稍辨雲鬢冉冉兮漸識
綃裾洛水之靈非匹巫山之夢不如所謂神仙之事變
化之異過隙之光已無傾國之容再媚悲審旨於凝聰

悼皇情於睟睟恍兮有望知感召之多方脩爾員來訝
生死之殊致當其椒風向夕蕙露盈庭謂已從於雲雨
終不間於幽冥寂寞瑤階永謝虛無之跡淒涼月幌猶
分似是之形若往還留心迷目眩誠君恩之再造異術
足徵豈風燭之重然真形可見固可以辨其妄輟其求
去清懷之感志釋玄思之殷憂擾擾紛紛意真靈之如
在薰歇燼滅竟荒塵之不留其來也形之如寄其往也
生之若浮於是望斷驚鴻悲深斛珮向窈窕而乍失顧

容華而不昧由是而言可以知生之不再

漢武帝重見李夫人賦

以神仙異術變化通靈為韻

唐
康僚

漢武帝諸宮此夫人兮恩意難同悲豔質以長逝恨深情之莫通夢想徒勞寧及九泉之下神仙有術能生一夕之中帝乃暫釋幽懷將觀異變儼宸儀於玉座張翠幄於蘭殿清風拂戶疑髣髴以徐來皎月臨軒尚朦朧而未見且其駐視潛聽虔思效靈燎金鑪之馥馥燦銀

燭以熒熒寂寞而求瞥爾而風生綺席從容以俟俄然
而影在花屏於時漸出形儀暗聞珠翠初半面以呈姿
忽全身而表異盈盈不笑如羞久別之容眷眷無言莫
問平生之事是則嬋娟可翫隱映難親不有如有非真
似真既揚翹而掩袂亦流盼以凝神翡翠簾前悵望三
千之女芙蓉帳裏分明二八之人況乎麗服逾春美顏
多暇楊檐如之羅綺飄颻若之蘭麝非因不死之藥豈
便長生何用返魂之香自從神化及夫弄花態以遺妍

望君王兮不前復認吹簫之侶終疑獻果之仙目眴眴
以待極心搖搖而詎傳迷甚化宮周穆之遊固爾地非
巫峽楚襄之夢應然已而頓解前思詳窺舊質爰將託
方士展神術謂傾城之且驗豈同輦之無日殊不知事
本憑虛功難責實夜如何其夜已闌悵飄然而復失

招李夫人魂賦

以所思逝魂傷
春榮落為韻

唐謝觀

李夫人月墜香焚花沈九原繁華委地零落何言有少
翁兮術通神鬼為漢帝兮夜致精魂於是詔未央之宮

備通靈之術五位之壇雜立九奏之音克序珠籠翠幃
龍師虎旅銀燭之煌煌次列金管之悒悒慢舉帝乃坐
中寢御纖幃森羽衛儼天師佩符籙以威重拂香花而
步遲左止蕭韶之奏右啟甲乙之旗搢霜珪而斂色執
紅旌而盡思立北斗星文之下當中壇月午之時萬籟
寂寥發清音於漢殿九天空闊寫招魂於楚詞詞曰白
玉潔兮紅蘭芳忽玉折兮蘭已傷魂兮勿復遊他方盍
歸來兮慰我皇又曰彩雲裾兮流霞袂倏而來兮忽而

逝魂兮勿復遊四裔歸來兮膺萬歲已而愴恨沾巾淒涼侍臣憲宰而房櫳變色熒煌而戶牖生春如扇如花開靚恍忽之中韋非煙非霧卷見希夷之外人珠璫瓊珮鬢髮絳脣髣髴平生之貌依稀歌舞之身顧步嬋娟迴翔綽約似發言而尚默若將前而復却於時斜漢將傾繁奏爰作琳琅璀璨綺羅迴薄風淒雨切忽消散於杳冥鳳去鸞歸空珠翠之寥落自是妖妄日恣虛無念作侮萬乘為脫屣陋百載之浮榮幸河海之無事賴干

戈之暫平不然少翁此夕豈宜一拜於文成

李夫人賦

元陳樵

李夫人既沒乙帳成寒蘭銷曼宇脂澤無華皇情弗豫
怨反生之不靈遲所思兮遲莫顧綺羅兮成堆撫瑤席
而不御熊蹯謝美露鵠非腴玉冷柘漿莖晞丹露臨扇
徵歌卷衣思舞飄玉笛兮聲轉悲璫碧樽兮無與佐傷
寶唾之餘花恨黃金之莫鑄於是承明受詔百靈授職
招錦車下軒掖薦玉壺藉蘭席羽仗宵陳侍臣在側月

照金缸流蘇五色靈風繞帷光儀可覲皇帝撫今懷故
悲喜交集顧謂枚乘曰陳大夫之麗藻輸予心之悞抑
緣情率禮為予賦之乘曰唯唯若有人兮望宸幄行珊
珊兮綬若若顧帳殿之未移感芳華之榮落冶步弄姿
映華迴立形迭成光綺態豔逸遠之若綵雲之方興近
之若珠樹之在室煜煜乎若晴華之依草娟娟乎若華
雪之映日丹萸並秀瑤枝共新顧李增穠懷芝比潤髻
鬟百合香傳五蘊玉色成丹長眉入鬢晞光髮九迴之

膏承露華百英之粉布蛾染桂傳齒編犀鬢隨衛巧腰
將楚細豔與華兮爭春目橫波兮翦水昔宴墮以為虞

兮今

原本闕
二字

夫衆媚方鸞鍛翮當蕙雁霜旦溫室之背

秋夕寒露之迎涼飈車無羽漢津無梁苔痕暗上黃金
印綠塵飛墮合歡牀顧今夕為何夕兮共珠璧之夜光
翹分翠羽衣縷鴛鴦條達如紫雜佩截肪綴石榴之華
鈿兮垂傅珥之明璫曳翠雲之華袿兮襲鬱金之羅裳
委芙蓉之裙袂兮緝繁繡之偏諸衣金錯之襠襦兮曜

湘綺之簷榆揚衡微笑宛轉躊躇懷華萼之連枝兮非
直以悅已之故也寧趣死而不一見兮有不死之具也
姿采如新穠華如故乍見乍泯出有入無望椒塗而不
進旋却立而引去冀芳訊之一陳兮蓄瑜辭而不吐朝
為終南之雲暮為渭川之雨瑜珥在几茵馮在車芬若
未寒微帳在華翰有點蛾之綠奩餘漬粉之瓜情脈脈
而不一言兮紛瓊瑰之盈懷昔為琴上之琅玕今為空
中之玉釵君心無所終薄兮使春帶之轉賒乘鸞有侶

拾翠有儔招漢女於璇淵命洛妃於春流攜玉姜以並
來挾綠華以共游上可以攄君王之邑邑下可以致芳
意之綢繆何忽來而獨往兮使驚望以增愁色似是而
情非兮曾不肯乎少休同車之子豔非世有曼姬在左
白台在右協律悲歌而撫節兮悅慶雲之光覆美人一
去而長存兮何必戀戀以為已憂也美人笑夫春華兮
春華謂非吾偶彩雲一散而無質兮華一去而莫予留
美人死而不死兮花見之而懷羞歌曰陳寶衣兮散璫

燭君不來兮輪兩角間何闊兮去何速誰與來兮兩鵝
鵠雄髮春深綠轉銷秋塵日暗黃金屋君王愛玉體無
使沈心曲帝又歌曰絳縷銷兮百子池娥影散兮明鏡
飛日昧昧兮損容輝來如雨兮青蛾眉光塵莫予羈異
香出予衣心悅予兮非令姿懷故心兮勞望思何姍姍
兮其來遲折蘅蕪兮復來歸於是司馬大夫起而為亂
亂曰罷迴波兮停白雪朝華蕪兮玉枝折玉既折兮汗
未晞望美人兮青雲霓斷夢殘香翡翠帷苔華玉上餘

芳宇海外殊庭未可期更待承華青鳥至

蔡伯喈女賦

魏
丁 虞

伊大宗之令女稟神惠之自然在華年之二八披鄧林
之曜鮮明六列之尚致服女史之話言參過庭之明訓
才朗悟而通玄當三春之嘉月時將歸於所天曳丹羅
之輕裳戴金翠之華鈿美榮曜之所茂哀寒霜之已繁
豈偕老之可期庶盡歡於餘年何大願之不遂飄微軀
於逆邊行悠悠而日遠入穹谷之寒山慙柏舟於千祀

負冤魄於黃泉我羈虜其如昨經春秋之十二忍胡顏
之重恥恐終風之我萃詠芳草於萬里想音塵之髣髴
蘄精爽於交夢終寂寞而不至哀我生之何辜為神靈
之所棄仰薜華之已落臨桑榆以歔歔入穹廬之祕館
亟踰時而經節歎殊類之非匹傷我躬之無悅修膚體
以深念歎蘭澤之空設佇美目於胡忌向凱風而泣血

明皇迴駕經馬嵬賦

以程及曉留芳
魂顧跡為韻


唐

黃滔

長鯨入鼎兮中原六龍迴轡兮蜀門杳鼇闕而難尋豔
質經馬嵬而空念香魂日慘風悲到玉顏之死處花愁
露泣認朱臉之啼痕莫不積恨絲絲傷心悄悄逝川東
咽以無駐夜戶下扃而莫曉裊雲萬疊斷腸新出於啼
猿秦樹千層比翼不如於飛鳥初其漢殿如子燕城若
讐驅鐵馬以飛至觸金輿而出遊謀於劍外駐此原頭
羽衛參差擁翠華而不發天顏愴恨覺紅袖以難留鴛
鴦相驚熊羆漸急千行之朱淚流下四面之霜蹄踐入

神仙表態忽零落以無歸雨露成波已沾濡而不及棧
閣重處珠旒去程玉壘之雲山暫幸金城之烟景旋清
六馬歸秦却經過於此地九泉隔越幾淒惻於平生釵
飄彩鳳之蹤鬢蛻玄蟬之跡茫茫而今日黃壤歷歷而
當時綺陌雨鈴製曲空有感於宮商龍腦呈香不可返
其魂魄空極宵夢寧逢曉妝輦路見梧桐半死煙空失
鸞鳳雙翔鏡殿三春莫問菱花之照耀驪山七夕休瞻
榆葉之芬芳大凡有國之尊罕或傾城之遇孰言天寶

之南面奚指坤維而西顧然則起兵雖自於青娥斯亦
聖唐之數



御定歷代賦彙外集卷十四